

«Avair il curaschi da far sbagls»

30 onns Giuvna Partida liberaldemocratica

DA GION NUTEGN STGIER / ANR

■ **Tranter ils numeurs gratulants èn stadas intginas personalitads dals liberals grischuns a l'occurrènza da giubileum. Per la partida «mamma» saja la Giuvna Partida liberaldemocratica in romin da gronda impurtanza. Er en l'avegnir saja dad avair quità da quella, han ditg bunamain tuts referents.** La festa da giubileum ha gì lieu a Cuir e quai en in rom festiv, famigliar ed empernaivel. Sa radunada per l'anniversari da 30 onns da la Giuvna Partida liberaldemocratica dal Grischun è blera prominènza dals liberals grischuns. Da la partida èn sa chapescha er stads varsaquants dals protagonistes che avevan fundà avant trais decennis la secziun dals giuvens. Beneventada è la raspada da festa vegnida da *Manuela Fetz* e *Raphaëla Hollinger*, las duas presidentas dals giuvens liberals. Ellas han er manà tras la saira e quai en moda frestga, sincera e plain vita.

Reto Mengiardi: padrin e grond promotur

Fundada è la Giuvna Partida liberaldemocratica dal Grischun vegnida ils 23 d'avust 1986 e quai a Cuir en l'hotel Stern. In dals confundaturs è stà *Christian Rathgeb*, da preschent president da la regenza grischuna. «Padrin» e grond promotur è cunzunt stà *Reto Mengiardi*, da lez temp cusseglier guvernativ e commember da la regenza chantunala. El ha sustegnì ferm l'idea da fundar la secziun per ils giuvens liberals e cun sia expe-

rientscha è Mengiardi er stà in cussegliader da gronda valur per ils iniziants da la Giuvna Partida liberaldemocratica dal Grischun. 30 onns pli tard ha quella 70 commembers che derivan da tut las regiuns da noss chantun.

Auguris das Christa Markwalder

Cun avair ina collisiun da termins ha *Christa Markwalder*, la presidenta dal cussegl naziunal, gì da renunziar a la festa da giubileum. Via telefon ha ella lura gratulà a la giubilara ed exprimì ses respect envers la muntada da la Giuvna Partida liberaldemocratica dal Grischun, l'engaschament dals giuvens a favur dal liberalissem e dad avair la perseveranza necessaria. La presidenta dal cussegl naziunal ha ditg als giuvens liberals da cuntinuar cun quel tgatsch sco fin ussa, dad esser er en l'avegnir plain motivaziun e da na emblidar er il plaschair da far politica.

Entrar en la giuvna partida

Rathgeb ha ditg che per la via politica saja da cussegliar ad ina matta u ad in mat d'entrar en ina giuvna partida. Da gronda impurtanza saja da sa laschar fascinar da quella dinamica che saja avant maun en ina partida cun be persunas giuvnas. Da gronda valur sajan er la cumpagnia, il plaschair da sa deditgar a la politica e lura er da laschar bler temp per sa profilar en la politica. Cun esser commember dad ina giuvna partida sa dervan er numerusas portas, ha ditg Rathgeb, el che ha fatg fin uss in carriera exemplarica sin champ politic. El ha cusseglià als giuvens liberals



Vinavant ad aut cun la pld giuvna: Raphaëla Hollinger, Christian Rathgeb, Manuela Fetz e Reto Mengiardi (da san.).

FOTOS G. N. STGIER

dad esser cunzunt er communicativs e quai er sur ils meds digitalis.

Star sin las chommas

Mengiardi, avant 30 onns il promotur da la Giuvna Partida liberaldemocratica, ha ditg als preschents che sco giuven en la politica saja er impurtant dad avair il curaschi da far sbagls. Ils politichers arrivads duaian lura er dar la pussaivladad als giuvens da sa profilar, acceptar els, esser buns exempels e betg mo vesair els sco persunas che duaian far vuschs tar elecziuns. Star sin las chommas er cun avair success en la politica ed esser serius e consequent, quai sajan aspects impurtants per far la dretga via politica. In da quels che vul far quai è er il giuven *Gian Donatsch* e vicepresidente da la Giuvna Partida liberaldemocratica dal Grischun. La libertad e l'interess per il stadi, quai sajan per el aspects decisivs per far politica en la pld. A pled èn er vegnids *Urs Marti*, il president da la citad da Cuir, e *Michael Pfäffli*, il president dal cussegl grond. Els han cunzunt fatg attent a las valurs dals liberals e dal liberalissem.

Pld cuntainta cun il preventiv 2017 e la reducziun d'impostas

■ (cp) Bravo e cumpliments per la regenza grischuna regard il preventiv 2017 preschantà l'eivna passada. La regenza prevezza da reduer l'imposta per persunas giuridicas, vuol dir impraisas, tanter 4 e 10 perschients, üna masüra chi fa dabsögn e chi vain salüdata da la pld. Cun quist pass, important e bain fuondà schi's ponderescha la situaziun da las finanzas chantunals, ha realisà la regenza chi vuol masüras. La situaziun economica es actualmaing fich delicata (seguondas abitaziuns, impraisas da fabrica e.u.i.) e cun quist pass as poja far alch cunter. Tals impuls sun necessaris e perquai da salüdar.

Sco chi muossa il preventiv nu's fa quint ne l'an chi vain ne ils ans venturs

cun cifras nairas. Güsta pervi da quai faja dabsögn da tour in mans las masüras da spargn e da structurar sco cha la pld tillas pretenda daspö ans. Quai eir pervi dal paket da la refuorma chi vain nan da la confederaziun. Da reduer uossa las impostas per persunas giuridicas nu dascha avair sco consequenza da dozar quellas per persunas natüralas in ün pèr ans. I's sto cumanzar uossa cun spargnar. Las pretaisas da la PLD. Ils Liberals Grischun per la reducziun da las impostas sun uossa accumuladas, ma ellas sun colliadas cun la pretaisa da spargnar in general. Trattand il preventiv 2017 sto tour sül seri il cussagl grand sia incumbenza e sieuer la proposta da la regenza.



Da la partida a la festa d'anniversari: Urs Cadruvi, Martin Schmid, cusseglier dals chantuns, e Martin Blumentahl (da san.).